

KANDUNGAN

JAWAPAN-JAWAPAN BAGI PERTANYAAN-PERTANYAAN JAWAB


LISAN YANG TIDAK DIJAWAB DI DALAM DEWAN

(SOALAN NO.9 HINGGA NO. 53)

3 APRIL 2017

NOTA: [RUJUK PENYATA RASMI HARIAN (HANSARD)]

**NURELFIRA BINTI MOHD DAUD
SEKSYEN PERUNDANGAN & PROSIDING
PARLIMEN MALAYSIA**



PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DATUK JUMAT BIN IDRIS [SEPANGGAR]

TARIKH : 3 APRIL 2017

SOALAN : 9

Minta **PERDANA MENTERI** menyatakan apakah langkah strategik Esscom dalam menjamin keselamatan para nelayan daripada menjadi mangsa serangan pengganas di perairan Sabah.

Tuan Yang Di-pertua,

ESSCOM sentiasa komited dalam menjaga keselamatan Pantai Timur Sabah. Pelbagai langkah telah diambil bagi membendung masalah jenayah rentas sempadan di Pantai Timur Sabah.

Langkah pengukuhan dan memperketatkan keselamatan yang dilakukan oleh ESSCOM khususnya di pusat peranginan, sangkar ikan dan laluan-laluan berisiko telah memaksa KFRG menukar *modus operandi* dengan mengubah sasaran-sasaran mudah seperti kapal-kapal dagang yang bergerak perlahan, bot-bot tunda, bot-bot nelayan terpencil dan lain-lain pendekatan secara rambang.

Justeru itu, ESSCOM sentiasa berusaha memperkemaskan atur gerak aset dan trup serta memantau dengan memberi keutamaan kepada pergerakan vesel-vesel yang bergerak perlahan atau yang mempunyai *low freeboard* serta bot-bot nelayan terpencil. Selain itu, aset-aset sentiasa digerakkan mengikut kawasan-kawasan yang disyaki berdasarkan pengamatan analisa ESSCOM di Pusat Operasi (PUSOP) tentang pergerakan mencurigakan/ "*irregular movement*" terhadap kapal-kapal atau bot-bot di kawasan Pantai Timur Sabah.

ESSCOM juga telah mewujudkan satu saluran komunikasi baru yang dikenali sebagai "*Channel 16*" bagi memudahkan perhubungan sekiranya ada berlaku kecemasan atau sebagainya. Para nelayan dan krew-krew kapal disarankan untuk menggunakan alat komunikasi dan perhubungan kerana alat ini berperanan sebagai

sistem perhubungan terkoordinasi di antara nelayan dan pasukan keselamatan. Sehingga kini, ESSCOM telah memasang 58 buah "repeater station" bagi "Channel 16" di balai-balai polis, markas taktikal dan pos-pos kawalan. Bilangan pemasangan alat ini akan ditingkatkan dari semasa ke semasa.

Selain daripada itu, ESSCOM sentiasa menggalakkan pemasangan *Automatic Identification System* (AIS) oleh pengusaha bot dan nelayan-nelayan supaya PUSOP dapat memantau pergerakan serta mengatur gerak bantuan sekiranya berlaku kecemasan. ESSCOM juga sentiasa mengalu-alukan bantuan dan sokongan daripada masyarakat awam terutamanya para nelayan agar memaklumkan maklumat atau infomasi berkenaan jenayah rentas sempadan kepada PUSOP ESSCOM.

Sukarelawan-sukarelawan Maritim juga telah ditubuhkan di mana Ahli-Ahli Parlimen di kawasan ESSZONE telah dilantik menjadi Komander Maritim Kehormat. Kita selanjutnya akan melantik Ahli-Ahli Sukarelawan Maritim yang terdiri dari warga tempatan untuk bersama-bersama menjaga kawasan masing-masing. Konsep menjaga keselamatan bersama-sama ini adalah sama dengan apa yang disebut sebagai keselamatan menyeluruh (HANRUH). Pendekatan ini membolehkan peranan tali-tali barut dikurangkan dan semangat menjaga Negara ditingkatkan. Negaraku Malaysia.

Sekian, terima kasih.

PEMBERITAHU PERTANYAAN DEWAN RAKYAT

PERTANYAAN : LISAN PM22(5)

DARIPADA : PUAN TEO NIE CHING [KULAI]

TARIKH : 3.4.2017

SOALAN :

Puan Teo Nie Ching [Kulai] minta **MENTERI PENDIDIKAN** menyatakan syarat-syarat untuk membuka kelas bahasa Tamil dan Cina di sekolah kebangsaan dalam waktu sekolah kenapa masih ada permintaan untuk membuka kelas bahasa ibunda yang tidak dilayan oleh pihak sekolah.

JAWAPAN

Tuan Yang di-Pertua,

Untuk makluman Ahli Yang Berhormat, sebagaimana termaktub di dalam Akta Pendidikan 1996, "kemudahan bagi pengajaran bahasa Cina atau Tamil hendaklah diadakan jika ibu bapa sekurang-kurangnya lima belas orang murid di sekolah itu memintanya". Sehubungan dengan itu, tiada halangan bagi mana-mana sekolah kebangsaan (SK) untuk membuka kelas bahasa yang berkenaan jika syarat tersebut dipenuhi.

Kementerian Pendidikan Malaysia telah menyediakan kurikulum Bahasa Cina Sekolah Kebangsaan (BCSK) dan Bahasa Tamil Sekolah Kebangsaan (BTSK) untuk pelaksanaan di SK. Masa pengajaran adalah

sebanyak 90 minit seminggu. Pengajaran dan pembelajaran Bahasa Cina dan Bahasa Tamil di sk bermula dari Tahun 1.

RJM88a

SOALAN NO. : 11

**DEWAN RAKYAT MALAYSIA
PERTANYAAN LISAN**

PERTANYAAN : LISAN

**DARIPADA : DATUK HAJI SHABUDIN BIN YAHAYA [TASEK
GELUGOR]**

TARIKH : 3 APRIL 2017 (ISNIN)

NO. RUJUKAN :

SOALAN :

Dato' Haji Shabudin Bin Yahaya [Tasek Gelugor] minta **MENTERI SUMBER ASLI DAN ALAM SEKITAR** menyatakan apakah pendirian Kerajaan Persekutuan terhadap cadangan penambakan laut bagi pembinaan tiga buah pulau buatan di Pulau Pinang yang dikhuatiri menjejaskan ekosistem serta sumber pendapatan nelayan setempat.

JAWAPAN:

Tuan Yang di-Pertua,

Sebarang cadangan projek pembangunan di Malaysia termasuklah penambakan laut hendaklah mendapatkan kelulusan daripada Kerajaan negeri contohnya daripada Pihak Berkuasa Tempatan melalui proses *One Stop Centre* (OSC) berdasarkan undang-undang yang berkaitan. Dalam proses OSC ini, Jabatan Alam Sekitar (JAS) merupakan salah satu agensi-agensi lain yang akan memberikan input berkenaan keperluan JAS bagi cadangan projek tersebut berdasarkan kepada Akta Kualiti Alam Sekeliling 1974.

Cadangan penambakan laut bagi pembinaan tiga buah pulau buatan di Pulau Pinang adalah tertakluk di bawah Seksyen 34A Akta Kualiti Alam Sekeliling 1974 di mana pemaju projek dikehendaki mengemukakan Laporan EIA kepada Jabatan Alam Sekitar (JAS) untuk kelulusan memandangkan projek tersebut merupakan aktiviti yang ditetapkan di bawah Perintah Kualiti Alam Sekeliling (Aktiviti Yang Ditetapkan) (Penilaian Kesan Kepada Alam Sekeliling) 2015.

JAS telah menerima *Terms of Reference* (TOR) Laporan EIA bagi cadangan projek tersebut yang telah disediakan oleh Jururunding EIA yang berdaftar dengan JAS, Dr. Nik & Associates Sdn Bhd (DNA) bagi pihak pemaju projek, Kerajaan Negeri Pulau Pinang dan SRS Consortium Sdn Bhd pada 11 Februari 2016 dan telah diluluskan pada 23 Mei 2016. Walaubagaimanapun sehingga kini JAS masih belum menerima Laporan EIA.

Pemaju projek dikehendaki menyediakan Laporan EIA dengan menjalankan kajian impak ke atas isu-isu kritikal antara lainya impak kepada kualiti air, hidraulik, ekosistem dan sosio ekonomi nelayan setempat. Laporan EIA tersebut juga hendaklah mengandungi antara lainya cadangan langkah-langkah kawalan, pelan pengurusan alam sekitar, pematuhan sendiri (*self regulation*), dan jadual aktiviti perlaksanaan projek di semua peringkat pembangunan projek tersebut.

Dalam hubungan ini, pemaju projek semasa pelaksanaan penambakan bagi pulau buatan hendaklah mengambil langkah pencegahan dan kawalan pencemaran yang berkesan seperti yang ditetapkan dalam Syarat-Syarat Kelulusan Laporan EIA. Sekiranya kerosakan atau pencemaran berlaku semasa kerja-kerja penambakan, pemaju projek adalah terdedah kepada tindakan perundangan serta menanggung segala kos yang melibatkan kerja-kerja rehabilitasi bagi kawasan yang terlibat.

JAS akan mengambil tindakan penguatkuasaan di bawah Akta Kualiti Alam Sekeliling 1974 dan Peraturan-Peraturan dibawahnya kepada pemaju projek sekiranya :

- (i) Projek telah dimulakan tanpa laporan EIA disediakan dan tidak mendapat kelulusan daripada JAS; dan
- (ii) Ketidapatuhan terhadap syarat-syarat kelulusan EIA projek tersebut seperti mengeluarkan notis arahan, kompaun atau tindakan mahkamah bagi projek yang telah mendapat kelulusan laporan EIA.

Disamping itu, JAS boleh mengenakan perintah berhenti kerja atau perintah larangan bagi projek yang belum mendapatkan kelulusan EIA, ketidakpatuhan terhadap syarat-syarat kelulusan EIA atau yang menyebabkan pencemaran yang serius.

Sekian, terima kasih.

PEMBERITAHU PERTANYAAN DEWAN RAKYAT

PERTANYAAN : LISAN

**DARIPADA : TUAN NIK MOHAMAD ABDUH BIN
NIK ABDUL AZIZ [PASIR MAS]**

TARIKH : 3.4.2017

SOALAN :

Tuan Nik Mohamad Abduh Bin Nik Abdul Aziz [Pasir Mas] minta MENTERI PENDIDIKAN menyatakan statistik pelajar sekolah dari seluruh Malaysia yang terlibat dengan aktiviti penyalahgunaan dadah.

JAWAPAN

Tuan Yang di-Pertua,

Untuk makluman Ahli Yang Berhormat, sepanjang tahun 2016 seramai 1,732 iaitu 1,720 murid lelaki dan 12 murid perempuan telah dilaporkan oleh Agensi Anti Dadah Kebangsaan (AADK) dan Polis Diraja Malaysia (PDRM) terlibat mencuba dadah.

SOALAN NO. : 13

**DEWAN RAKYAT MALAYSIA
PERTANYAAN LISAN**

PERTANYAAN : LISAN

DARIPADA : IR. SHAHARUDDIN BIN ISMAIL [KANGAR]

TARIKH : 3 APRIL 2017 (ISNIN)

NO. RUJUKAN :

SOALAN :

IR. SHAHARUDDIN BIN ISMAIL [KANGAR] minta **MENTERI SUMBER ASLI DAN ALAM SEKITAR** menyatakan apakah langkah serta usaha yang diambil oleh pihak Kementerian dalam membendung daripada berlakunya pencemaran sungai antaranya Sungai Jernih serta Sungai Chuping dan apakah persediaan Kementerian bagi mengelakkan masalah pencemaran dapat diselesaikan dalam masa yang terdekat.

JAWAPAN:

Tuan Yang di-Pertua,

Kementerian Sumber Asli dan Alam Sekitar melalui Jabatan Alam Sekitar (JAS) telah dan masih meneruskan usaha bagi mengawal pencemaran sungai khususnya bagi punca-punca seperti pelepasan industri, loji-loji kumbahan, serta projek pembangunan yang tertakluk di bawah Akta Kualiti Alam Sekeliling 1974 (AKAS 1974). Antara punca-punca lain yang boleh menyumbang kepada pencemaran sungai adalah pelepasan daripada pusat penyediaan makanan, aktiviti perladangan, aktiviti penternakan dan juga projek pembangunan yang dikawal oleh pelbagai agensi.

Antara usaha dan persediaan yang diambil oleh JAS bagi mencegah dan mengawal pencemaran yang boleh menjejaskan kualiti air sungai adalah:

- (a) Melaksanakan penguatkuasaan terhadap aktiviti industri secara pematuhan sendiri (*self regulation*) oleh industri;
- (b) Menjalankan penguatkuasaan secara menyeluruh (termasuk pemeriksaan / siasatan ke premis - '*command and control*') terhadap pengoperasian premis-premis dan juga projek pembangunan yang tertakluk di bawah AKAS 1974;
- (c) Melaksanakan pemantauan secara *desktop enforcement* melalui sistem pemantauan jarak jauh menerusi sistem telemetri, sistem pemantauan pelepasan bulanan (*Monthly Discharge Monitoring*)

System) yang diwajibkan ke atas industri yang menghasilkan efluen supaya semua punca-punca tersebut mematuhi AKAS 1974 dan Peraturan-peraturan di bawahnya;

- (d) Melaksanakan pemeriksaan susulan bagi menentusahkan pelaporan yang dikemukakan adalah berintegriti dan tepat dengan situasi yang berlaku di lapangan. Tindakan penguatkuasaan seperti amaran bertulis di lapangan (*field citation*), Notis Arahan, tawaran kompaun, penyitaan peralatan, perintah larangan operasi atau tindakan mahkamah akan dikenakan ke atas mana-mana punca yang didapati tidak patuh;
- (e) Menyemak dan membuat pindaan-pindaan kepada peruntukan AKAS 1974 dan peraturan yang berkaitan sebagai penambahbaikan selaras dengan perkembangan semasa teknologi kawalan pencemaran dan kaedah pengurusan alam sekitar yang dinamik dan kompleks;
- (f) Menerbitkan pelbagai dokumen dan garis panduan serta menjalankan aktiviti kesedaran alam sekitar bagi meningkatkan kefahaman pihak-pihak yang berkenaan ke arah pematuhan kepada kehendak perundangan alam sekitar yang berkuatkuasa; dan
- (g) Mempertingkat dan memperkemaskan program-program pemantauan kualiti air yang dilaksanakan oleh Jabatan bagi memenuhi keperluan bagi membuat keputusan.

Selain itu juga, pihak Kementerian turut memperkuat pelaksanaan Strategi Lautan Biru Kebangsaan (NBOS) bersama mana-mana agensi yang berkaitan dalam menangani sesuatu isu pencemaran dengan lebih berkesan.

Sekian, terima kasih.

**PEMBERITAHUAN PERTANYAAN DEWAN RAKYAT
JAWAPAN OLEH YB DATUK SERI DR. S. SUBRAMANIAM
MENTERI KESIHATAN MALAYSIA**

**PERTANYAAN : LISAN
DARIPADA : YB DR. KO CHUNG SEN [KAMPAR]
TARIKH : 3 APRIL 2017
SOALAN :**

YB Dr. Ko Chung Sen [Kampar] minta Menteri Kesihatan menyatakan :

- a) jumlah wang yang dijangka dikutip dari pesakit hospital Kerajaan tahun ini berbanding beberapa tahun lepas memandangkan pelbagai bayaran baru yang diperkenalkan.
- b) Sama ada wang yang dikutip ini akan disalurkan semula kepada Kementerian Kesihatan untuk membeli lebih banyak ubatan untuk pesakit

Tuan Yang di-Pertua,

Pengemaskinian Perintah Fi (Perubatan) 1982 melibatkan kenaikan wad, rawatan dan siasatan bagi Kelas 1 dan kenaikan caj bagi wad kelas 2. Sehubungan itu, anggaran hasil yang akan dikutip melalui kenaikan caj tersebut adalah RM27.4juta bagi kenaikan wad, rawatan dan siasatan bagi Kelas 1 dan RM2.24juta bagi kenaikan caj wad

sebanyak 25% menjadikan jumlah anggaran hasil sebanyak RM29.6juta.

Walau bagaimanapun, kutipan hasil melibatkan caj pesakit pada tahun 2017 juga dijangka lebih rendah daripada nilai jangkaan tersebut kerana pengemaskinian Perintah Fi (Perubatan) 1982 di 17 buah hospital yang mempunyai kelas 1 dan kelas 2 telah ditangguhkan pelaksanaannya sehingga fasiliti di hospital tersebut dinaiktaraf.

Hasil yang diterima oleh Kerajaan Persekutuan termasuk hasil yang dikutip oleh Kementerian Kesihatan dan akan dimasukkan ke dalam Kumpulan Wang Disatukan selaras dengan Perkara 97 Perlembagaan Persekutuan.

Dana daripada Kumpulan Wang Disatukan sebahagian besarnya akan digunakan untuk membiayai keseluruhan Perbelanjaan Mengurus termasuk emolumen, hutang, subsidi, penyelenggaraan aset Kerajaan dan pembelian ubat-ubatan. Manakala lebihan dana daripada Kumpulan Wang Disatukan (sekiranya ada) akan digunakan juga untuk menampung sebahagian daripada Perbelanjaan Pembangunan seperti pembinaan hospital, sekolah, jalan raya dan penyediaan bekalan air bersih di setiap negeri. Semua perbelanjaan tersebut dapat memberi manfaat dan faedah kepada rakyat di seluruh negara.